


Төрлет, Жаңа жыл!



ЗАН

ZANMEDIA.KZ

✉ zangazet@mail.ru

№99 (3728)
27 желтоқсан 2024



газеті

Қоғамдық-саяси, құқықтық газет

• ЛЕБІЗ

ӘРБІР ӨЗГЕРІС ЕЛ БОЛАШАҒЫН БАЯНДЫ ЕТУГЕ БАҒЫТТАЛАДЫ

ҚҰРМЕТТІ ӘРІПТЕСТЕР,
ОҚЫРМАНДАР!

Қазақстан Республикасы Судьялар одағының атынан баршаңызды келе жатқан Жаңа жыл мерекесімен құттықтаймын!

Жаңа жыл – өткен жылды саралап, болашаққа үмітпен қарайтын ерекше кезең. Бұл мереке бізге жаңа мақсаттар мен жоспарлар құрып, алға ұмтылуға, жаңа белестерге қол жеткізуге шабыт береді. Сонымен қатар, Жаңа жыл отбасымызбен және жақындарымызбен бірге болуға, жаңаша ойлар мен жобаларды жүзеге асыруға мүмкіндік туғызатын маңызды сәт.

Бұл кезеңде біз бір-бірімізге қолдау көрсетіп, түсіністік пен бауырмалдықты нығайтуға, қоғамдағы тепе-теңдікті сақтауға күш саламыз. Бірлігіміздің арқасында елімізде көптеген жетістіктерге қол жеткізіліп, жаңа биіктерге көтерілуге жол ашылды. Осылайша, Жаңа жыл еліміздің тұрақтылығы мен өркендеуіне серпін беріп, қоғамымыздың дамуына маңызды үлес қосады.

Өткен 2024 жыл еліміз үшін айрықша кезең болды. Бұл жылда құқықтық реформалар мен жаңа заңдар қабылданып, әділдік пен заңдылықты нығайтуға елеулі үлес қосылды. Әлеуметтік, экономикалық және саяси реформалар еліміздің дамуына ықпал етіп, құқықтық жүйенің өзгеруіне септігін тигізді. Мемлекет басшысының бастамасымен жүзеге асырылған саяси реформалар қоғамдық өмірдің барлық саласында өзгерістер мен жаңашылдықтарға жол ашты. Құқықтық жүйені жаңғырту барысында сот және құқық қорғау органдарының тиімді әрі әділ жұмыс істеуін қамтамасыз ету бағытында маңызды шаралар қабылданды. Сонымен қатар, экономикада жүзеге асырылған реформалар елдің бәсекеге қабілеттілігін арттырып, халықтың әл-ауқатын жақсартуға мүмкіндік берді. Әлеуметтік салада білім беру, денсаулық сақтау және еңбек құқықтарын қорғау бағытында да елеулі өзгерістер орын алды. Бұл реформалар тек заңнамалық деңгейде ғана емес, сонымен қатар қоғамның мәдениеті мен азаматтардың құқықтық санасының өзгеруіне де ықпал етті. 2024 жыл мемлекет үшін тұрақтылық пен өркендеуге бағытталған жаңа жол ашқан маңызды кезең ретінде тарихта қалды.

Алдағы 2025 жыл еліміз үшін жаңа мүмкіндіктер мен үміттер әкеледі деп сенеміз. Қазіргі уақытта жүзеге асып жатқан реформалар әрбір қазақстандықтың өмірін жақсартуға және құқықтық жүйенің дамуына оң әсер етуде.

(Соңы 2-бетте)

(Соңы 2-бетте)

• БҮГІНГІНІҢ БАС ТАҚЫРЫБЫ

ЫНТЫМАҚТЫ ЕЛДІҢ ЫРЫСЫ МОЛ



Жаңа жылдың табалдырығын аттағалы тұрғанда өзімізге есеп беру, бар мен жоғымызды түгендеу әдетіміз. Сондайда ұлу жылының жалпы елге, сонымен бірге біздің алақандай ұжымымызға да жайлы болғанына шүкір дейміз.

(Соңы 2-бетте)

• ТҰҒЫР

Бауыржан ЫСҚАҚ, «Тұран-Астана» университетінің профессоры:

«ӘЛЕМДІК ЭКОНОМИКАЛЫҚ ТҰРАҚСЫЗДЫҚТЫҢ ӨЗІ БІЗ ҮШІН ҮЛКЕН ТӘУЕКЕЛ»

– Бауыржан Мұратбекұлы, 2024 жылғы ел экономикасындағы басты оқиғалар деп неі атай аласыз?

– Бірінші кезекте экономиканың негізгі драйверіне айналып отырған инвестициялық жобаларды айтуға болады. Бізде құны 1,5 трлн теңгеге жуықтайтын 180 инвестициялық жобаның қосылғаны туралы мәлімет бар. Оның 160-тан астамы металлургия, химия, мұнай, автокөлік, туризм, ауыл шаруашылығы, тамақ өнеркәсібі сияқты өңдеу секторына тиесілі. Бұл импорт алмасуға өз әсерін тигізеді. Соның нәтижесінде 25 мыңға жуық адам жұмыспен қамтамасыз етіліп, біздің сыртқа шығатын экспорттымыздың көлемі 6 триллион теңгеге артып, импортқа тәуелділігіміз 1,5 триллион теңгеге төмендеген. Екіншісі, өңдеу

өнеркәсібі 5 пайыздық өсім көрсетті. Бұл көрсеткіш машина жасау, қара және түсті металлургия, химия өнеркәсіптері салаларында көрсетілген. Жалпы ішкі өнімнің өсуі бірінші жартыжылдықта 3,3 пайызды құрап, өндіріс көлемі 2,5 пайыздан асты.

Биыл инфляция баяулады. Мысалы, маусым айында жылдық инфляция 8,5 пайызға дейін төмендеді. Бұл көрсеткіш былтырғы сәйкес уақытта 9,5 пайыз болған. Яғни, биыл 1 пайыздың көлемінде айырмашылық бар. Азық-түлік тауарына деген бағаның өсуі 5,5 пайызға, азық-түлік емес тауарларда 7,5 пайызға дейін баяулағанын көріп отырмыз. Салыстырмалы түрде айтатын болсақ, 2023 жылға қарағанда 2024 жылы едәуір экономикалық оң процестің орын алғанын айтуға

болады. Сондай-ақ сыртқы сауда балансының да жақсаруын атап өту керек. Мысалға бірінші жартыжылдықта сыртқы сауда айналымы 55 млрд долларды құрады. Оның ішіндегі экспорт 1,5 пайызға өсіп, 32,5 млрд долларды, ал импорт 7,5 пайызға қысқарып, 22 млрд долларды құрады. Яғни, оң сауда балансы 9,5 млрд долларды құрап, ол өткен жылмен салыстырғанда кезеңде 32 пайызға нығайды. Осындай факторлар экономикадағы әртараптануды кезіндегі жақсы қадамдар деп айтуға болады.

– Мемлекет басшысының экономикалық тұрақтылықты қамтамасыз ету бойынша тапсырмаларын Үкімет қаншалықты жүзеге асыра алды?

– Экономиканың тұрақтылығын қамтамасыз

ету бойынша Президенттің арнайы тапсырма бергені белгілі. Үкімет сол тапсырманы орындау үшін әртүрлі қадам жасады. Енді оның тиімді не нәтижесіз болғанын әртүрлі бағалауға болады. Негізгі нәтижелерін жаңа да айтып өттім. Мәселен, инфляцияны төмендетуде үдеге жетті. Инфляция 9,5 пайыздан 8,5 пайызға дейін төмендеді. Бағаның төмендеуі де үкіметтің жұмысын бағалауға оң әсерін беретін фактор. Өңдеу саласындағы инвестициялық жобалар, 25 мың адамның жұмыспен қамтамасыз етілуі де оң үрдіс. Бұл макроэкономикалық көрсеткіш бойынша жақсы нәтижелерге жеткізді.

Көп аймақтарда халықты жұмыспен қамтамасыз ету, экономикалық даму қарқынының төмен екенін әлі де байқап отырмыз. Тауарлардың бағасын тұрақтандыру және халықтың табысын арттыру мәселесі де толық шешілген жоқ. Мемлекет тарапынан қабылданған бағдарламалардың орындалу қарқыны да баяу. Бұл енді үлкен кемшілік. Өйткені ақшаның бағдарламалармен бөлінуі бір басқа, оны игеру бір басқа. Яғни, игеру мәселесіне келген кезде дұрыс бағыттардың жүзеге аспай жатқанын көруге болады.

(Соңы 5-бетте)

